

# QUÆSTIO MEDICA.

QUODLIBETARIIS DISPUTATIONIBUS  
manè discutiendæ in Scholis Medicorum, die 7<sup>ov</sup>is  
decimâ quintâ Novembris.

M. FRANCISCO AIGNAN, Doctore  
Medico, Præside.

*An Dysenteria, potissimum pituitosa, statim initio, Emetica?*

## I.

**O**MNIS cruenta egestio per intestina, dysenteria ab Hippocrate dicitur. Egestionis illius cruentæ multæ sunt causæ, multiplex item species atque modus. Causæ sunt ( antiquioris medicinæ calculo ) hepatis *ἀτρία*, evacuatio periodica, expressio symptomatica, ac tandem exulceratio intestini, in qua abradendo & exulcerando molesta sunt quæ illuc confluunt, & illuc effluunt excrementa; qualia esse solent colliquamenta febrium tabificarum, tum critica febrium acutarum, tum dysenterica splenicorum excrementa, postremo eorum, qui sponte dysentericæ morbo implicantur, quam vel bilis flava, vel atra, vel etiam pituita putris & salsa excitavit. Hæc omnia sigillatim perspiciat Medicus, ut convenienter, & appositè remedia præscribat. Prima igitur degestionis cruentæ causa est hepatis *ἀτρία*, quæ cernitur in ventris proluvie rubra, quam vulgus Medicorum fluxum hepaticum vocat; in hac egerendi ratio facilis est, sine morfu, ac tormine intestini, donec adultior facta ceperit esse nigra, & intestinis molesta. Altera dysentericæ causa, est hepatis *ἐντρία*, cujus virtute prorumpit sanguis ad intestina fortiter, ac liberalliter; ac salutaris est illa dysenteria, & periodica puri sanguinis. Talis est verna dysenteria Epheborum & juvenum, si fortè careant hæmorrhagiæ commodis, his enim ætatibus, cum ceperint Venerem experiri, vel asperam vocem edere, sanguinem illi profundunt è naribus. Talis est dysenteria eorum, qui ad curationem cruris perfracti sic parte sauciâ collocantur, ut diutius

quam par est, altior sit. Talis eorum est etiam, qui altero crure sunt mutili, si nullam quotidiani victus partem detraxerint. Alia est ab oppressionē hepatis, quæ non cietur liberaliter, & fortiter. Hæc triplex dysenteria merè cruenta est, & impermixta, diversam quæ prorsus curandi rationem exigit ab intestinali, quam ulcus intestini exprimit.

## I I.

**I**NTESTINALIS dysenteria, cruentata est alui dejectio cum dolore, & ventris torsione. Hanc torminum appellatione comprehendit Celsus. Incipiente morbo, primum biliosa est alvus, aut certè mucosam fundit intestinorum pituitam, inde subpinquis sit, modico cruore perfusa: posthac strigmenta, interiores ve tunicae intestinorum prodeunt excrementis cruentis ac purulentis mixtæ: novissimè ipsa deteritur, proditque cum purulentâ intestinorum proluvie caro, quæ veram eorum complet substantiam. Inter hæc autem omnia, cruor paulatim, & brevioribus intervallis per alvum manat, is quæ modo cum stercore aliquo, modo cum mucosis quibusdam corpusculis excernitur: multus in ano dolor, multa quæ ac frequens desidendi cupiditas est: cum utroque hoc exiguum quid exit, protinus quæ tormentum intenditur, ac rursus post paulum levatur, ipse æger quiete caret, & à somno interpellatur, dejectionibus & interdum febriculâ impeditus. In quo autem maxime intestino morbus inhærescit, primum ex situ doloris intelligitur, deinde ex permixtionis ratione. Etenim si dolor altius circum umbilicum versatur, si cruor, & quidquid corraditur fecibus alvi exquisitè misceatur, intestina superiora afficiuntur: si vero id purum ac minimè permixtum excidit, seorsum quæ alvi fæces descendunt, inferiora, crassiora quæ morbum sustinent.

## I I I.

**D**YSENTERIÆ intestinalis ( ut omnium fere morborum ) causa procatartica, seu evidens, duplex recensetur, dicta & aër. Priorem accuratè notavit Hippocrates in biliosis, quibus pleuritide laborantibus, si imperatur meracior aqua mulsæ, illa gignit bilem crassam & effæram, quæ intestina, & sedem exulcerat. Idem accidit per edacitatem carminum bubularum, & ingluviem vini fortis, id quæ potissimum ætate, quæ calidissima sit, & siccissima; & in his quibus ventres nimium calent, his enim fortia vina, & cibi perturbatio

nem faciunt summi Dictatoris oraculo. Aër dysenteriarum feracissimus procreator est, si tempestatum alteratione & alienatione inficiatur, & corrumpatur. Ab iis duabus causis bilis aut flava redditur, aut nigra, atque pituita seu liquor gastricus putris & salus, quæ proximè alvinam dysenteriam exulcerando faciunt. Harum trium internarum causarum, quæ dysenteriam procreant, frequentior & paratior ad id pituita est; quod probant temporum defectiones, quibus uberius cumulatur ille humor, autumno scilicet ob tempestatis illius inæqualitatem, qua perspiratio impeditur, *πλεονεξία* serosa generatur, alvi quæ humectantur, quo idcirco tempore dysenteria regnat sæpius epidemica, vere etiam sicco & aquilonio, si austri pluvix quæ hyemem occuparunt, dysenteria plurimos malè habet; inde scilicet quod hyeme, & pluviosa Congeritur pituita, & austrina, calidiori scilicet, salsa evadit: hujus humoris copiam & vitium adaugente aquilonio verè succedente; propterea quæ dysenteriiis gignendis accommodata pituita, postquam illa diu multùm quæ mordendo & abradendo vitiaverit intestina, ut pote quæ in sinuosis intestinis subsistit, atque quodammodò stabulatur, ac pigro lapsu meat. Quo fit ut continenter acri sua qualitate abradendo exulceret, ac dysenteriam cum egestionem cruenta edat.

## I V.

**D**YSENTERIÆ pituitosæ, quæ singulis ferè annis in hac urbe popularis est, ideam & curationem nobis reliquit Hippocrates: hic sane morbus (inquit ille) accidit cum pituita & bilis affixæ sunt ad venas alvi, & ad ipsam quoque alvum; hinc vitiatur sanguis, & corruptus egeritur. Vitiatur etiam intestinum quod abraditur & ulceratur; atque hic morbus est longus, & sævus, & sæpè mortiferus: verum si firmo corpore, validis quæ adhuc viribus adhibita fuerit medicina, spes quidem est evadendi. Sin autem consumpto jam corpore, & alvo in totum exesâ remedia præscribantur, hinc nulla salus vitæ sperabilis. Igitur statim pharmacum dato potui, quod pituitam sursum expurget; tum postquam alvum lacte prolueris, reliquum corpus, ut decet, curato; ac siquidem febre careat, opimis, pinguibus, dulcibus atque humidis; continenter inutilia & incommoda ex alvo subducito: tum calidâ multâ, quæ infrâ sunt umbilicum, partes foveto, si dolor adsit. Portiones autem sorbitiones, & cibos convenienter exhibere oportet.

**H**ANC dysenteriae pituitosae curandae rationem ab Hippocrate commendatam, & in usum adhibitam servare debent, qui se ejus successores esse gloriantur. Itaque ut primum hic morbus sui notas dederit & praesentis temporis constitutione, diætâ, & excretorum qualitate, & aliis signis, statim oggerendum est stibium, vel radix brasiliensis, quin etiam ipsum vitriolum, quorum aptius praescribet sagax medicus, & usu peritus. Hic arte vomitu excitato, humor pituitosus dysenteriae causa utiliter evacuitur, alias nociturus, si diutius retineretur. Post modum humor superstes mitificandus erit; quod securè praestabunt forbitiones ex hordeo, oryza, amygdalis, & seminibus frigidis paratae. Non mediocriter quoque conferet lac vaccinum ignito ferro ustulatum, cui benè admiscebuntur cornu cerui, Ebur philosophicè præparata, terra lemmia, Corallia, Margaritæ, oculi cancerorum &c. in eundem usum injiciuntur Enemata ex decocto herbarum lenientium, capitis vervecini, fuminis vitulini. si vero dolor urget, consilio Hippocratis, calidâ fovendus enter, vesicæ lacte plenæ huic imponendæ, quin & panni decocto emolliente madidi abdomini superjiciendi sunt. Nec temere hic Laudanum adhibetur. Quorum omnium vim æquat, venæ sectio, an non superat? Meminerit interim, qui curat, hæc secundaria esse præsidia, quæ tardioris adjumenti sunt & sæpius inutilis, nisi præcesserit vomitus Emetico sollicitatus.

*Ergo Dysenteria, potissimum pituitosa, statim initio, Emetica.*

#### Domini Doctores disputaturi.

<i>M. Andreas Cressé.</i>	<i>M. Ambrosius Nicolaus Chemineau.</i>	<i>M. Nicolaus Raissant, Senatus Parisiensis Medicus ordinarius.</i>
<i>M. Armandus Josephus Collot.</i>	<i>M. Joannes Gelly.</i>	<i>M. Petrus Pourret, unicus Fratris Regis, dum viveret, Medicus ordinarius.</i>
<i>M. Philippus Caron, Pharmacia Galenica &amp; Chymica Professor.</i>	<i>M. Michaël Sauvvalé.</i>	<i>M. Dyonisius Dodart, serenissima D. D. Principis Dotaria de Conty Medicus, Regia scientiarum Academia socius.</i>

Proponebat Parisiis LUDOVICUS GUILLOT, Magniacus, Baccalaureus Medicus. A. R. S. H. 1703.

Apud Viduam Francisci Muguet, Regis & Facultatis Medicinæ Typographi.